

PREDGOVOR

Ova knjiga je nastala kao plod mog dugogodišnjeg stručnog i naučnog rada u sportu, posebno upravljanja sportskim objektima i događajima, ali i mog dugogodišnjeg istraživanja studija poznatih i priznatih autora ne samo iz oblasti menadžmenta uopšte, nego, prije svega, menadžmenta u sportu, a menadžmenta spostskih objekata i događaja posebno. Knjiga je zasnovana na teorijskoj analizi i empirijskom istraživanju teorijskih modela i praktičnih pristupa uspostavljanja menadžerskog naučnog pristupa u sportu, posebno u upravljanju sportskim objektima i događajima. Težnjom da menadžment ovlada prostorom u sportu, ponekad se zaboravlja da on nije sinonim za biznis. On je, svakako, nešto više – sistem upravljanja integralnim, to jest svim funkcijama i procesima u sportu, u kojima biznis strategije označavaju, prije svega, menadžersku efikasnost.

U tom smislu polazim od ocjena različitih autoriteta da je period tranzicije na ovim prostorima obilježen, pored ostalog, i u traganjima za najdjelotvornijim metodama rada, ne samo u organizovanju preduzeća, nego i u drugim područjima rada i stvaranja. Odgovorni kadrovi u sportu i sportskim organizacijama takođe tragaju za efikasnim načinima rada u upravljanju sportskim objektima i događajima. Evidentno je, međutim, da među njima postoje različiti pristupi, te da se nude različita rješenja. S jedne strane prisutna je orijentacija da se u našim sportskim organizacijama trebaju njegovati specifični stilovi rada i upravljanja koji su karakteristični za naše ljude i naše kulturno naslijeđe, dok je, s druge strane, izraženo shvatanje da je bolje preuzeti i implementirati neki model koji je efikasan u nekoj od razvijenijih evropskih ili svjetskih zemalja.

Kreatori promjena koji se angažuju da razviju sopstveni model ustvari teže da ranije organizacione modele prilagode duhu i zahtjevima novog vremena (što je skoro nemoguća misija), jer zaboravljaju da je to dug i neizvjestan proces sa mnogo pokušaja i pogrešaka, dok oni koji teže da implementiraju tuđa iskustva zaboravljaju da puka aplikacija i tvrdoglava implementacija tuđih iskustava na naš sport, bez obzira da li došla sa istoka ili zapada u zemlji tranzicije, ne može donijeti brze i očekivane rezultate.